



**CRNA GORA
MINISTARSTVO UNUTRAŠNJIH POSLOVA**

**INFORMACIJA O PRUŽANJU HUMANITARNE POMOĆI BOSNI I HERCEGOVINI
RADI SANIRANJA POSLJEDICA POPLAVA**

Podgorica, oktobar 2024. godine

Operativno-komunikacioni centar 112 Direktorata za zaštitu i spašavanje Ministarstva unutrašnjih poslova, koji je operativna kontakt tačka sa Centrom za koordinaciju odgovora na vanredne situacije (ERCC) Generalnog direktorata za evropsku civilnu zaštitu i aktivnosti humanitarne pomoći Evropske komisije (operativno tijelo Mehanizma Unije za civilnu zaštitu) primio je zahtjev Bosne i Hercegovine za pomoć u saniranju posljedica poplava, 5. oktobra 2024. godine.

U zahtjevu se navodi da su obilne padavine, koje su zahvatile Bosnu i Hercegovinu u posljednjih 48 sati izazvale bujične poplave i klizišta u centralnom i južnom dijelu zemlje, prije svega u Neretvanskom kantonu, Centralno-bosanskom kantonu i Zenica-Doboj kantonu, što je dovelo do velikog broja stradalih i nestalih osoba i Bosna i Hercegovina nije u stanju da se sama izbori sa ovom vanrednom situacijom. Takođe, navodi se da je Vlada Federacije Bosne i Hercegovine proglasila stanje elementarne nepogode, 4. oktobra 2024. godine.

Bosna i Hercegovina zatražila je sljedeću međunarodnu pomoć: timove za traganje i spašavanje iz ruševina (MUSAR) – 3 tima, K9 timove – 3 tima, bagere sa inženjerskim jedinicama, agregate – 500 komada, pumpe – 50 komada, montažne mostove sa rasponom od 20-40 metara – 5 komada, sušače vlage – 300 komada, kontejnere, šatore, poljske krevete, vreće za spavanje i drugu sličnu opremu.

Sagledavajući dostavljeni Zahtjev za pomoć, Ministarstvo unutrašnjih poslova u saradnji sa opštinskim službama zaštite i spašavanja i uz saglasnost Glavnog grada, Prijestonice Cetinje, opština Ulcinj, Bar, Budva, Kotor, Herceg Novi, Plužine i Nikšić i vatrogasaca-spasilaca, spremno je da pruži pomoć sa timom koji se sastoji od dvije komponente: komponenta za traganje i spašavanje iz ruševina (light USAR) i komponenta tima visokog kapaciteta za crpljenje vode (High Capacity Pumping – HCP), koji ukupno broji 23 vatrogasaca-spasioca, 5 pripadnika Crvenog krsta Crne Gore i 4 pripadnika Direktorata za zaštitu i spašavanje, koji čine menadžment tima.

Tim sa sobom nosi odgovarajuću opremu za traganje i spašavanje iz ruševina i 2 pumpe visokog kapaciteta za crpljenje vode. Transport članova tima i opreme će se izvršiti sa 11 vozila (tehnička vozila, kamioni za transport, kombi vozila itd) i jednim kvadrom – ATV vozilo. Ministarstvo unutrašnjih poslova će članovima tima obezbijediti ishranu, prevoz i osiguranje tokom boravka u Bosni i Hercegovini.

Radi operativnosti timu je potrebno obezbijediti sljedeće:

- vodi tima Milanu Radoviću na žiro račun u CKB banci: 510010396526017367 uplatiti iznos od 7.000,00 eura za operativne troškove (gorivo – 2.000,00 eura, ishrana – 3.000,00 eura i ostali operativni troškovi na terenu i za vrijeme transporta – 2.000,00 eura),
- neograničen mobilni internet za menadžment tima (4 osobe) – 40,00 eura; i
- osiguranje za članove tima – 600,00 eura.

Ukupno 7.640,00 eura.

Takođe, Ministarstvo unutrašnjih poslova pružice i pomoć, koja će se sastojati od vreća za spavanje – 50 komada i ćebadi – 300 komada, u procijenjenom iznosu 9.000,00 eura.

Da bi se ova pomoć pružila Bosni i Hercegovini, potrebno je da Vlada Crne Gore donese odluku o upućivanju tima koji se sastoji od dvije komponente: komponenta za traganje i spašavanje iz ruševina (light USAR) i komponenta tima visokog kapaciteta za crpljenje vode (High Capacity Pumping – HCP), kao pomoć Bosni i Hercegovini (član 7, stav 1 Zakona o upotrebi jedinica Vojske Crne Gore u međunarodnim snagama i učešću pripadnika operativne jedinice za zaštitu i spašavanje, policije i zaposlenih u organima državne uprave u mirovnim misijama i drugim aktivnostima u inostranstvu ("Službeni list CG, br. 61/08, 31/17, 34/17 i 46/19)) i 50 vreća za spavanje i 300 ćebadi (član 36 stav 1 alineja 4 Zakona o zaštiti i spasavanju („Službeni list CG", broj 13/07,32/11, 54/16, 146/21 i 3/23).